



Editorial

Bon Dia Aruba ta defini su principio como esnan di independencia y berdad. Nos corant ta considerá como su obligacion, publicá semper e berdad sin tuma na cuenta e consecuencianan cu esaki por tin, dor di ta un organo di expresion independiente.

Victor Toko Winklaar

Triunfo di Lady K y Rusty ta triunfo di pueblo pa fiesta di pueblo y tin cu ser respetá

Festival a crece y bai laga organizadornan atras

Nos tin un aire di negativismo ta suplando riba nos isla y ta parece cu tur loke nos tin, nos ta criticá y tur loke nos haci, tin un grupo cu ta trata di kibra esaki.

Carnaval ta un di e periodonan caminda mester tin alegría, gozo y placer pero poco poco esaki tambe ta ser transformá den un periodo di discusion formal, tin ora riba asuntonan cu por a ser solucioná c'un aña di anticipacion.

Aruba ta un país grandi, di hendenan grandi cu tin un curashi inmenso pa superá cualkier obstáculo, pero poco poco e Arubiano mes ta birando un obstáculo pa e Arubiano y esaki sin duda algun ta di lamentá.

Carnaval ta bon ehempel di esaki, caminda tur hende sa di adelantá kico tin cu ser haci pa e próximo aña pero poco ta busca un solucion den e 12 lunanan cu ta sigui.

Diasabra último tabata otro ehempel di e mal custumber cu nos tin aki na Aruba y cu ta birando un estorbo grandi den nos crecemento como país y como pueblo.

Calypso y Roadmarch contest a bolbe comprobá cu el a crece bai laga hende atras, principalmente esnan cu tin cu cuida y organizá e evento aki.

E evento di mas grandi cu tin aki na Aruba di nos propio hendenan, ta simplemente algo sensacional mientras cu e ambiente of construccion rond di e evento, a keda paralizá den tempo.

Nos mihor artistanan ta riba escenario pa oranan largo deleitando e mayor público cu a yega di asistí na un evento te den oranan di mainta.

Público, calidad y presentacion di e artistanan, ta di alto nivel pero asina mes por mira cu e organizacion no ta cuadra y no ta na nivel di e evento.

No ta cuestion di criticá hende of organizacion, pero shonnan calypso y roadmarch festival a crece bira un evento grandi mientras cu e organizacion a keda un enano cu ta stroba e festival di crece. Nos no kier bira parti di e criticanan cu tin rond di tur loke tin di haber cu carnaval, pero nos artistanan a bolbe demostrá cu nan por pone un espectáculo di primera clase y consecuentemente nan merecé un trato di primera clase tambe.

Pa mas cu 20 aña caba tin e discusion riba e bendita stage riba cual e cantante y bandanan tin cu presentá, y awe den e milenio nobo aki cu tur sistemanan moderno cu tin rond di nos, e stage ta sigui parce algo di "stenen tijdperk".

E evento di Diasabra anochi merecé un mihor escenario, caminda e artistanan merecé di haña un trailer privá na parti patras di esaki, pa prepará nan mes cu nan grupo pa subi y duna público e show tremendo cu nan ta duna tur bes.

Awacero simplemente no por ta un estorbo na un ocasion asina grandi y e espectáculo tin cu sigui, pero atrobe si e stage ta uno barata cu no ta na nivel di e espectáculo di e artistanan, anto ta pasa loke a pasa Diasabra anochi.

Un país cu ta acomoda artistanan manera Gloria Estefan, UB-40, Juan Gabriel, Jose Feliciano, y otro grandinan cu tur comodidad

posibel, mester por acomodá nos propio artistanan.

Nan merecé di keda den un hotel un dia promer cu e evento, nan merecé bai pa e stadion den un limousine manera otro grandinan, ya cu berdaderamente nan a demostrá aña tras di aña cu nan ta grandi como espectáculo.

Artistanan cu por pone mas cu 8000 persona templa un stadion, merecé un mihor trato pero esaki ta posibel unicamente si nos cambia e mentalidad cu tin aworaki.

Nos artistanan ta sigui crece bai y ora un espectáculo ta conta cu artistanan grandi di nos país, manera entre otro Claudius Philips, Rusty, Ruben Trappenberg, Singing J, Anthony Gario, Lord Cachete y otro, simplemente nan merecé e mihor trato posibel.

Ora cu nos mira e mihor bandanan musical di nos país, cu e mihor músiconan riba stage, ta un espectáculo di primera clase e público ta bai haña pa mira y nada pero nada mag stroba un espectáculo asina.

Ni awacero ya cu e público no a move mes ora cu awa a cai manera baki for di cielo, sperando riba Rusty, un di e idolonan grandi di e festival aki.

Nos ta kere cu mester tin mas respet, respet pa ganadornan y respet pa perdedornan y stop cu discusionnan sin sentido riba entre otro e ganador di e aña anterior.

King of Queen di Calypso y Roadmarch mester actua na final di anochi y punto, y si tin un cantante of grupo cu kier baha su corona, e tin cu duna un mihor presentacion y no keha di adelantá cu e tin cu participa den tiramento di lot.

Rusty y Lady K a merecé di gana, mescos cu hopi otro a merecé di gana tambe, pero nan escogencia sin duda algun merecé mas respet di tur hende, y nan Reinado no tin mag di ser manchá cu crítica y observacionnan sin sentido.

Tanto Inky como Rusty ta leyendanan di música di carnaval, y nan tin temanan cu ta mas cu diez aña bieuw cu ainda ta zonando fuerte tur aña mescos cu varios otro leyenda di nos historia rico di roadmarch y calypso.

Nan composicionnan tabata bal un premio y nan triunfo ta triunfo di e pueblo carnavalesco y esaki tin cu ser aceptá.

Loke si ta malo ta e forma con kier pone regla nobo tur aña, caminda ta forza cantantenan hinca nan composicion, den un corsette pa asina e mustra bon pero sin rosea.

Mester tin mas flexibilidad y si ta pone regla nobo, pone nan awe, awor cu e festival di e aña aki a caba y no spera te otro aña pa bolbe presentá reglanan nobo cu ta bruha mas cu e ta drecha.

Nos no ta kere cu kitamento di punto a haci un diferencia den e decision di Diadomingo madrugá, al contrario e tabata coronacion di un anochi magnífico caminda tur hende mester sinti nan mes ganador.

Tin cosnan cu tin cu cambia y pa logra e cambionan necesario, pa logra mas beneficio pa nos artistanan, ta rekerí un cambio di mentalidad tambe serca tur hende envolví.